

Wednesday, August 26, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

UNION MINISTER NITIN GADKARI

Union Minister of Road Transport and Highways of India Pu Nitin Gadkari chuan Mizoram hmasawwna tur kawngpui 6 siamna tur cheng vbch 256 leh nuai 70 an pawm tih a sawi.

Pu Nitin Gadkari hian Social media account kaltlangin he thu hi a sawi a, Mizoram hmasawwna atan kawngpui 6 siamna tur cheng vbch 256 leh nuai 70 an pawm tih sawiin kawngpui hi kilometre 82.89 a thui tur ani tih sawiin Central Road Infrastructure Scheme hnuaia thawh tur ani a ti bawk.

Union Minister chuan ramchhunga kawngpui hrang hrang siam niin hmasawwna a thleng mek a ti a, hmun kilkhawr leh tlawhpawhna mumal lo ah a mi cheng ten hmasawwna an neih ve theih nan theihtawp an chhuah tih sawiin kawngpui hmasawwna chuan a mi cheng te eizawwna an hmuh theih nan leh danglamna a thlen dawn tiin zirna, sumdawwna leh hriselna kawngah leh khawsak phungah hmasawwna a thlen dawn tih a sawi a ni.

BJP Mizoram State President Dr K. Beichhua chuan Mizoram kawng siam nana sawrkar laipuiin pawisa tam tham tak a pe chu lawmawm atih thu sawiin kawng chhia nasa takin a tih ziaawm ngei a beisei a ti a, Mizo mipui harsatna hrethiama hmasawwna tur ngaihtuahtu Prime Minister Narendra Modi kaihhruai sawrkar chungah Mizo mipuite an lawm tih a sawi bawk.



CM : FCRA

Chief Minister Pu Lalduhoma'n Foreign Contribution (Regulation) Amendment Bill, 2026 chu pass lovin, Mizoram sorkar leh kohhran hruiute ngen angin Joint Parliamentary Committee ah refer a ni tih a sawi.

Assembly session nimina neihah Tuirial bialtu MLA Pu K. Laldawngliana zawhna chhangin Chief Minister Pu Lalduhoma chuan FCRA Bill 2026 chu Mizoram Sorkar leh Mizoram Kohhran Hruaitu Committee leh Council of Churches in Mizoram aiawhin August ni 6 khan Union Home Minister hnenah Joint Memorandum thehluh a ni a ti a. He Memorandum-ah hian Bill chu withdraw tur leh, withdraw a remlo a nih pawhin siamtha leh tur te in point hrang hrang thehluh a ni tiin hemi hnu hian August ni 9-ah Union Home Minister hnenah he bill hi pass lova Joint Parliamentary Committee a refer mai turin Chief Minister leh MKHC leh

CCM hmingin ngenna thlen leh a ni a. He ngenna ang hian August ni 12 khan he bill hi JPC ah refer a ni ta tih a sawi a ni.



SMART METER PROTEST

Smart Meter vangà harsatna tawktute huaihawtin vawiin khan Treasury Office kawt, Aizawlah Smart Meter-a lungawilohna lantir a ni.

He lungawi lohna lantirna buatsaihtute zinga mi RTI & Social Activist, Pu Zairemthanga chuan Peaceful protest an buatsaih chhan chu mipui hriattirna awm loa smart meter vuah luh te leh smart meter vuah hnua bill sang lutuk bakah complain in awmzia a neih thin loh avang a ni tiin zir chianna mumal awm loa vuah ringawt leh state dangah nasa taka an dodal laia Mizorama vuah an lo hmanhmawh vak chu nakin zelah harsatna lian zawk a thlen dawn ati a, thingtlang lamah electric bill pek theih loh avanga disconnect an awm hial thei tih a sawi bawk.

Pu Zairemthanga chuan an harsatna chu sawrkarin en fiah se a duh tiin meter vuah tawhte la thla leh vek tur leh la vuah loh pawh en dik hmasak vek a nih hma chuan vuah chhonzawm tawh lo turin sawrkar an phut tih a sawi a ni.

Byte: Zairemthanga

He hunah hian mipui pungkawmte chuan Bill pung nasa lutuk chu sorkarin enfiah tura an duhthu leh enfiah a nih hma chu smart meter vuah chhonzawm an duh loh thu te an au rual a. Resolution an pass bawk a ni.



TRAFFIC SPECIAL DRIVE

Aizawl Traffic Police chuan nizan dar 9 atanga tukin khawvar dawn thlengin Zan Special Drive a kalpui a; dán bawhchhiatna hrang hrang avangin mi 35 an man.

Aizawl Traffic Police tarlan danin, nizana Zan Special Drive an kalpuinaa an man hi Driving License neilo lirthei khalh mi 14, Lirthei ri bengchheng 9, tlan phal loh zawnga lirthei khalh 3, Helmet diklo khum 2, Helmet khumlo Two Wheeler khalh 1, Two Wheeler-a phalchin aia tam inphur 1, rui chung a lirthei khalh 1, duhdah taka lirthei number ziaak 1, Lirthei tlan phal lohnaa tlan 1, Register loh lirthei khalh 1 leh LMV head light chhia 1 te an ni.

Aizawl Traffic Police chuan mipuite chu lirthei hman leh enkawl danah tan la thar zel turin an chah a, duty awm remchan lohna hmuna dan bawhchhiatna thlengte chu Traffic Control Room (9366553559 & 0389-2313061)-ah hriattir turin an chah a. Kawngpui dung a lo hima; zan lamah pawh thlamuang taka mitin kan veivah theih nan Zan Special Drive chu a tul anga kalpui zel a ni dawn tih an sawi a ni.

